



بولتین ياديم Buletin

YADIM

YAYASAN DAKWAH ISLAMIAH MALAYSIA

www.yadim.com.my



MUSAADAH, SANITASI DI MASJID KAMPUNG KUBANG DAN KAMPUNG BUKIT KADIR



NILAI – Selepas Gambang, Pahang, Skuad Sanitasi Masjid Yayasan Dakwah Islamiah Malaysia (YADIM) pada 4 Mac meneruskan program pembersihan berkenaan di Surau Kampung Kubang dan Masjid Kampung Bukit Kadir di sini.

Seramai 10 kakitangan YADIM melakukan kerja pembersihan tersebut di kedua rumah ibadah berkenaan menggunakan alat Fogging Sanitation, Water Purifier dan Disinfection Gun untuk aktiviti nyah kuman dan virus. YADIM pada masa yang sama turut menyumbang sebanyak 250 pek barangan keperluan harian kepada kariah kedua rumah ibadah berkenaan.

50 pek disumbangkan di Surau Kampung Kubang manakala selebihnya di Masjid Kampung Bukit Kadir. Masjid berkenaan turut menerima sumbangan RM8,000

pada majlis ini sumbangan YADIM dan Pusat Pungutan Zakat Wilayah.

Sementara itu, YADIM juga melakukan kerja kerja pembaikan di surau Kampung Kubang. Antara yang dilaksanakan ialah penggantian pagar dan mengecat semula surau itu.

Kedua majlis disempurnakan oleh Menteri di Jabatan Perdana Menteri, Yang Berhormat Senator Datuk Dr Zulkifli Mohamad Al Bakri yang turut melakukan gimik kerja kerja sanitasi di surau dan masjid tersebut.

Hadir sama ialah Yang Dipertua YADIM, Yang Berbahagia Ustaz Nasrudin Hassan dan Ketua Pegawai Eksekutif YADIM, Tuan Kamarul Arief Tuan Soh.



DR ZULKIFLI LANCAR

Sambutan Hari Wanita 2021

PUTRAJAYA – Bertempat di Auditorium Jabatan Kemajuan Islam Malaysia di sini, telah berlangsung pelancaran Sambutan Hari Wanita 2021 anjuran Majlis Wanita Islam Yayasan Dakwah Islamiah Malaysia (MAYA) pada 8 Mac.

Program julung kali anjuran MAYA itu disempurnakan oleh Menteri di Jabatan Perdana Menteri, Yang Berhormat Senator Datuk Dr Zulkifli Mohamad Al Bakri.

Ia bertujuan untuk melestarikan peranan wanita Islam dengan menelusuri suri teladan Ummahatul Mukminin yang terdidik melalui tarbiah langsung daripada contoh Rasulullah SAW. Penganjurannya juga selaras dengan Dasar Manhaj Rabbani yang telah diangkat menjadi polisi di Jabatan Perdana Menteri (Hal Ehwal Agama).



Program ini juga dihadiri oleh Yang Dipertua YADIM, Yang Berusaha Ustaz Nasrudin Hassan, Ketua Pegawai Eksekutif YADIM, Tuan Kamarul Arief Tuan Soh, Pengerusi MAYA, Dr Safinar Salleh, pengurusan kanan YADIM serta wakil wakil jabatan.

Dalam pada itu, turut diadakan dalam pelancaran ini ialah kempen program 1Minggu 1Ringgit (1M1R) dan penyampaian anugerah kepada empat wanita istimewa yang kesemuanya merupakan sumber inspirasi untuk semua.

Berhubung 1M1R, Dr Zulkifli menyifatkannya sebagai satu inisiatif yang sangat baik dan disokong beliau sepenuhnya.

Selesai majlis pelancaran, program disambung dengan sesi Forum Mega 1 bertajuk “Wanita Besi: Fantasi atau Realiti”. Ia menampilkan mantan Pengerusi Majlis Perundingan Wanita Islam Malaysia, Dato’ Kamalia Ibrahim serta Penyandang Institusi Raja-Raja Melayu Universiti Teknologi MARA, Profesor Madya Datuk Dr. Shamrahayu A. Aziz manakala Timbalan Pengerusi MAYA, Yang Berhormat Senator Asmak Husin pula selaku moderator.

Pada sebelah petang pula majlis bersambung dengan Webinar Antarabangsa bertajuk “Wanita dan Cabaran Pandemik Covid-19” yang menampilkan panel panel dalam dan luar negara.

Sambutan Hari Wanita 2021 berlangsung selama tiga hari bermula 8 hingga 10 Mac dengan pelbagai pengisian seperti forum, sidang selari, pameran dalam talian dan sebagainya.

CABANG BAHARU DAKWAH YADIM

SERI KEMBANGAN – Gerak kerja dakwah masa kini memerlukan pelbagai kaedah dan cara baharu untuk menarik perhatian masyarakat. Ia ditambah pula dengan cabaran masa kini yang bukan sahaja mendesak kepada cara kreatif, tetapi juga kos yang tinggi.

Atas faktor ini, Yayasan Dakwah Islamiah Malaysia mengambil keputusan berani keluar daripada keselesaan dan menceburi bidang perniagaan runcit bukan saja untuk menambah dana, tetapi juga memastikan kemapanan kewangan bagi melancarkan gerak kerja dakwah badan ini.

Bertempat di Bandar Putra Permai di sini, YADIM pada 10 April telah mengadakan pelancaran Pasar Raya YADIMart yang disempurnakan oleh Yang Dipertuanya, Ustaz Nasrudin Hassan.

YADIMart merupakan manifestasi kesungguhan YADIM untuk melestarikan gerakan dakwah yang mempunyai cakupan luas termasuk dalam bidang ekonomi dan perniagaan.

Dalam ucapannya, Ustaz Nasrudin berkata kerja kerja dakwah tidak seharusnya mengikut rutin semata mata, sebaliknya mestilah dipelbagaikan.

Tambah beliau, tanpa meninggalkan apa yang selama ini dilaksanakan, YADIM mahu menerokai bidang baharu dalam dakwah termasuklah perniagaan.

Menerusi keuntungan bidang ini nanti jelas beliau, ia akan digunakan semula untuk melestarikan gerakan dakwah di negara ini, menerusi pelbagai aktiviti YADIM.

YADIMart merupakan sebuah pasar raya pertama milik YADIM, yang mempunyai keluasan 5,880 kaki persegi ini dan menjual lebih daripada 2,000 produk daripada kategori segar dan keperluan isi rumah.

Ia memberi keutamaan kepada para usahawan kecil dan sederhana Bumiputera Muslim untuk membekalkan produk mereka di YADIMart selain daripada produk produk berjenama yang popular bagi isi rumah di Malaysia.

Pada masa yang sama, YADIMart akan memberikan perhatian khusus kepada aspek sumbangan kebajikan. Untuk tujuan ini, foodbank dalam bentuk rak makanan ditempatkan di premisnya untuk membantu golongan yang memerlukan.

Dalam pada itu, turut diadakan pada majlis pelancaran ialah sumbangan voucher membeli belah di YADIMart kepada 30 asnaf terpilih di sekitar kawasan ini.



PUTRAJAYA – Yayasan Dakwah Islamiah Malaysia (YADIM) menasaskan sebanyak 1,000 aktiviti sepanjang pelaksanaan program Ihya Ramadan Sebulan YADIM (Irsyad 360), kata Yang Dipertuanya Ustaz Nasrudin Hassan.

Menurut Ustaz Nasrudin, Irsyad 360 akan dilaksanakan di seluruh negara oleh pihaknya sama ada di peringkat pusat ataupun negeri negeri.

“YADIM akan berusaha untuk mengimarahkan bulan Ramadan kali ini dengan pelbagai aktiviti di segenap lapisan masyarakat,”.

“Kita tidak akan jadikan Covid-19 sebagai alasan untuk tidak penuhkan Ramadan ini dengan program program yang membawa manfaat kepada semua lapisan masyarakat,”katanya ketika ditemui selepas pelancaran Irsyad 360 di Surau An Najah di sini pada 7 April.



1,000 PROGRAM SEPANJANG IRSYAD 360

Pelancaran program itu disempurnakan oleh Menteri di Jabatan Perdana Menteri (Hal Ehwal Agama), Yang Berhormat Senator Datuk Dr Zulkifli Mohamad Al Bakri.

Hadir sama ke majlis ini ialah Pengarah Jabatan Agama Islam Wilayah Persekutuan, Datuk Mohd Ajib Ismail dan Ketua Pegawai Eksekutif YADIM, Tuan Kamarul Arief Tuan Soh.

Dalam pada itu Ustaz Nasrudin menjelaskan, antara program yang bakal dilaksanakan pihaknya termasuklah singgah sahur, edaran makanan berbuka puasa, tadarus Al Quran, selain program secara dalam talian.

Pada masa yang sama, beliau turut menegaskan penganjuran program oleh pihaknya akan dilakukan dengan mematuhi semua SOP keselamatan dan kesihatan bagi mengelak penularan Covid-19.

Sementara itu, Datuk Dr Zulkifli memuji inisiatif YADIM menganjurkan Irsyad 360 yang menurutnya membuktikan YADIM tidak pernah berhenti daripada melaksanakan gerakan dakwah.



“Kesungguhan YADIM melaksanakan program ini bukan perkara baharu, tetapi diberi nafas baharu, semangat yang baharu, dengan program baharu, yang disesuaikan dengan naratif zaman kita,” ujar beliau.

Dalam majlis ini juga, YADIM turut menyampaikan sumbangan kepada Daie Komuniti, Daie Orang Asli, Sukarelawan YADIM serta kepada Surau An Najah sendiri dan pihak Pertubuhan Kebajikan Islam Malaysia untuk mereka melaksanakan program di bulan puasa kali ini.

Turut diadakan ialah pelancaran Buku 100 Persoalan Puasa hasil nukilan Pengarah Kanan Sektor Pembangunan Ummah dan Wanita YADIM, Ustaz Azhar Yahya.



NADIKU 2021

BINA KESEDARAN, BENTENG PERTAHANAN AKIDAH UMAT ISLAM

PUTRAJAYA – Sebagai usaha mengangani ancaman serangan terhadap Islam terutamanya dalam bentuk ajaran salah, Yayasan Dakwah Islamiah Malaysia (YADIM) pada 13 Mac telah melancarkan program Nadwah Islami Kekuatan Ummah (NADIKU) 2021.

Dengan tema ‘Jauhi Ajaran Salah’, ia telah dilancarkan oleh Timbalan Menteri di Jabatan Perdana Menteri, Yang Berhormat Datuk Ahmad Marzuk Shaary di sini.

Pelancaran program secara dalam talian ini, turut disertai Ketua Pengarah Jabatan Kemajuan Islam Malaysia, Yang Berbahagia Datuk Abdul Aziz Jusoh dan Yang Dipertua YADIM, Yang Berbahagia Ustaz Nasrudin Hassan.

Dalam ucapannya, Datuk Ahmad Marzuk berkata, pelancaran NADIKU 2021 sangat bertepatan dengan usaha untuk memurnikan dan memperbetul akidah umat Islam di negara ini daripada pelbagai bentuk ancaman.

Tambah beliau, semua agensi berkaitan juga perlu memainkan peranan dalam menjayakan usaha menangani ancaman pemikiran dan serangan terhadap Islam pada masa kini.

Sementara itu, Ustaz Nasrudin dalam ucapannya berkata, YADIM akan menganjurkan NADIKU 2021 secara bersiri dan berperingkat di seluruh negara sebagai menyempurnakan tanggungjawab sebagai sebuah gerakan dakwah.

NADIKU ujar beliau, tidak akan berhenti setakat pelancaran semata mata, tetapi akan diteruskan dan disebarluaskan di negeri-negeri selepas ini.

Sementara itu pada masa yang sama, turut diadakan ialah pelancaran Program Daie Komuniti YADIM yang mana merupakan program dakwah dan pendidikan kerohanian bertujuan untuk meningkatkan kefahaman dan pengamalan Islam di kalangan anak-anak muda dan keluarga.

Antara penekanan asas yang diterapkan dalam Daie Komuniti termasuklah modul Tauhid, modul Feqah, modul Akhlak, modul Al Quran yang mana akan menggunakan rujukan sumber buku yang tertentu.





MAJLIS MENANDATANGANI

PERJANJIAN USAHASAMA YADIM – MOBILITY ONE

PUTRAJAYA – Yayasan Dakwah Islamiah Malaysia pada 9 April telah menandatangani perjanjian dengan syarikat Mobility One Sdn Bhd bagi tujuan pembangunan dan pelaksanaan perkhidmatan fintech bagi program penjaan dana infaq badan dakwah ini.

Menerusi perjanjian itu nanti, ia akan membolehkan masyarakat membuat pilihan bagi melaksanakan infaq sama ada di premis peniaga yang dilantik Mobility One dan YADIM atau secara atas talian melalui aplikasi mudah alih dan portal.

Mewakili YADIM dalam perjanjian ini ialah Yang Dipertuanya, Ustaz Nasrudin Hassan manakala Mobility

One oleh Ketua Pegawai Eksekutifnya, Dato' Hussian A. Rahman.

Perjanjian ini disaksikan oleh Menteri di Jabatan Perdana Menteri, Yang Berhormat Senator Datuk Dr Zulkifli Mohamad Al Bakri.

Hadir sama ke majlis ini ialah Ketua Pegawai Eksekutif YADIM, Tuan Kamarul Arief Tuan Soh serta pengurusan kanan kedua-dua pihak.

Nasrudin dalam aluannya berkata, dana yang dikutip pihaknya akan digunakan dalam pelbagai gerakan dakwaah YADIM di seluruh negara yang meliputi program seperti kebajikan, perkaderan, pendidikan dan sebagainya.

“Kita harap dapat perkenal saluran bayaran infaq dengan lebih mudah dan berkesan, yang akhirnya memudahkan masyarakat menghulurkan sumbangan mereka.

“Selain itu inisiatif ini juga akan memperkenalkan kaedah kutipan melalui portal badan bukan kerajaan yang berdaftar bersama YADIM,”ujarnya.

Datuk Zulkifli dalam ucapan beliau pula berkata, inisiatif digerakkan YADIM ini sangat baik dan diharap akan berupaya memperkasa badan dakwah ini.





MASJID ALUMNI LIMAUAN BUKTI PENCAPAIAN UMAT ISLAM SABAH

KIMANIS – Sebuah masjid baharu diberi nama Masjid Alumni Limauan bakal dibina di Kampung Andus Papar di sini yang menelan belanja RM5 juta.

Berucap pada majlis melancarkan Kempen Khairat/ Infaq pembinaan masjid berkenaan pada 26 Mac, di lokasi pembinaannya, Menteri Tugas Tugas Khas Sabah, Yang Berhormat Datuk Haji Mohd Arifin Mohd Arif menyatakan komitmen serta sokongan kerajaan negeri bagi memastikan ia dapat direalisasikan.

Beliau turut memuji inisiatif Alumni Sekolah Menengah Kebangsaan Agama Limauan ini yang bersungguh sungguh membina masjid berkenaan.

Hadir sama ke majlis ini ialah Pengerusi Yayasan Limauan, Haji Samin Haji Ongki yang memaklumkan, bagi menyokong pembangunan dan perkembangan komuniti masjid berkenaan kelak, sebuah penempatan baru yang dikenali sebagai Desa Limauan akan dibangunkan berdekatan rumah ibadah ini.

Desa Limauan ujarnya, bakal terdiri daripada kediaman, rumah kedai dan kolej pendidikan yang bakal mengubah wajah Kampung Andus Papar menjadi lokasi tumpuan umum.



Tambahnya, lokasi pembinaan masjid ini yang terletak di tepi Lebuhraya Pan Borneo juga memberi kemudahan untuk musafir yang menggunakan lebuhraya itu untuk singgah beribadah.

Beliau mengambil kesempatan merayu pihak berkuasa, badan dan tokoh tokoh koporat, bank, syarikat berkaitan kerajaan dan orang perseorangan untuk menyumbang dana pembangunan masjid berkenaan sebagai saham akhirat.

Samin yang juga Pengerusi Jawatankuasa Pembinaan Masjid ini percaya orang ramai akan memanfaatkan kedatangan Ramadhan dengan menyumbang bagi tujuan ini.

Kata Pengarah Yayasan Dakwah Islamiah Malaysia (YADIM) Sabah ini lagi, jika dana terkumpul telah mencapai RM500 ribu, kerja pembinaan akan dimulakan sambil menunggu dana sumbangan seterusnya.

Di hari pelancaran kelmarin sebanyak RM 250 ribu telah terkumpul hasil sumbangan alumni Limauan, Syarikat Milik Alumni iaitu Hidayah Permai Construction, Ariffin Sudin Arkitek, Farmasi Aslam, Razak and Associates, Datuk Haji Mohd Arifin dan Cement Industries Sabah.

Orang ramai boleh menyalurkan sumbangan untuk pembinaan masjid ini di akaun Bank Islam 1005 2010 1216 23.



KUALA TERENGGANU – Bertempat di perkarangan Pasar Kedai Payang di sini, telah berlangsung program Semarak Dakwah 2.0 Kuala Terengganu pada 14 Mac.

Ia dianjurkan Yayasan Dakwah Islamiah Malaysia (YADIM) Terengganu dengan kerjasama seramai 60 ahli Sukarelawan YADIM, Urus Setia Penerangan Darul Iman (UPDI), Akademi Didik Ulama Amilin Terengganu (DUAT) dan Urus Setia Belia Sukan Negeri Terengganu (UBSNT).



Dirasmikan oleh Ahli Parlimen Kuala Terengganu, merangkap Timbalan Menteri Sains, Teknologi dan Inovasi Malaysia, Yang Berhormat Datuk Haji Ahmad Amzad Mohamed@Hashim, ia bertujuan menyeru rakyat Terengganu supaya menyemarakkan solat berjemaah di masjid dan surau.

Datuk Haji Amzad turut menyantuni 20 pemandu bas dari Persatuan Pemandu Bas Kuala Terengganu dengan menghulurkan kit Musa'adah YADIM serta sumbangan wang tunai.



Beliau bersama tetamu jemputan turut melaksanakan street dakwah Kempen Penghayatan Ibadat Solat bersama para sukarelawan kepada pengunjung-pengunjung serta peniaga Pasar Kedai Payang.

Seramarak Dakwah 2.0 mensasarkan kira-kira 1,000 anggota masyarakat sekitar Kuala Terengganu.

Selesai di Pasar Payang, rombongan YADIM bergerak ke Seberang Takir, Bukit Tunggal dan Bukit Payong untuk 3 lagi program dakwah seterusnya bersama pemimpin setempat.



Sumbangan

PERALATAN BERNIAGA UNTUK IBU TUNGGAL DI TAMBIRAT

SAMARAHAN – Membesarkan anak-anak tanpa pekerjaan tetap memberikan cabaran yang cukup besar, apatah lagi jika yang memikul tanggungan tersebut adalah seorang ibu tunggal.

Namun itulah yang dihadapi Nayah Sedi dari Kampung Tambirat di sini. Tanpa sumber pendapatan tetap dan hanya bergantung kepada bantuan bulanan Jabatan Kebajikan Masyarakat, wanita ini berusaha gigih membesarkan lima anaknya termasuk seorang Orang Kelainan Upaya. Kehidupannya boleh dikatakan begitu perit hingga ada ketikanya terpaksa meminjam beras untuk mengalas perut anak-anaknya.

Kesukaran Nayah mendapat perhatian Yayasan Dakwah Islamiah Malaysia (YADIM) Sarawak ketika berkunjung ke Kampung Tambirat pada 6 Mac lalu. Menurut Nayah, dia tidak mahu bergantung dan menyusahkan sesiapa, malah jika boleh mahu berniaga kecil-kecilan di hadapan rumahnya bagi menampung pendapatan keluarganya.

Prihatin dan terharu dengan ketabahan wanita ini, YADIM Sarawak membuka infaq daripada orang ramai bagi membeli barang-barang keperluan berniaga untuk membantunya memulakan perniagaan.

Syukur Alhamdulillah ia mendapat sambutan menggalakkan. Hasil daripada infaq dan sumbangan YADIM, pada 14 Mac telah disampaikan sumbangan berbentuk barang peralatan berniaga kepada Nayah berjumlah RM1,300.

Antara barangan yang disampaikan ialah kanopi 10 kaki x 10 kaki, meja lipat, dua buah kerusi, periuk nasi elektrik, kualiti, senduk, tong gas, dapur masak, tong nasi, dua unit tong air minuman, kertas nasi lemak, set cawan plastik, dua beg beras, telur, minyak masak dan lain-lain barang serta wang saku untuk modal beliau memulakan perniagaan.

Beliau menyatakan rasa syukur dan berterima kasih kepada YADIM Sarawak dan ahli Sukarelawan YADIM atas bantuan yang telah diberikan kerana ia sangat bermakna lebih-lebih lagi dengan kedatangan Ramadan tidak lama lagi.





YADIM MELAKA BANTU SEDIA PUSAT REHAT E HAILING PERTAMA MALAYSIA

AYER KEROH – Menerusi kerjasama dengan kerajaan negeri Melaka, Yayasan Dakwah Islamiah Malaysia (YADIM) Melaka telah terlibat membantu menyediakan sebuah kemudahan berehat untuk pemandu dan penunggang perkhidmatan E Hailing di negeri ini.

Pusat di Kompleks Melaka Mall itu merupakan yang pertama seumpamanya di negara ini, bagi kemudahan penunggang dan pemandu E Hailing berehat.

Ia disediakan atas dasar keprihatinan kerajaan Melaka, bagi menghargai sumbangan golongan ini terhadap ekonomi negeri itu.

YADIM membantu menyediakan kemudahan solat di pusat tersebut dengan sumbangan sejadah dan pelekat doa.

Pada majlis ini juga, YADIM menyantuni seramai 200 pemandu dan penunggang E Hailing yang hadir dengan sumbangan barangan keperluan harian untuk mereka.

Hadir ke majlis ini ialah Ketua Menteri Melaka, Datuk Seri Utama Sulaiman Md Ali, Pengerusi Jawatankuasa Perumahan, Kerajaan Tempatan dan Alam Sekitar Melaka, Datuk Seri Abdul Ghafaar Atan, Pengarah Kanan Sektor Pembangunan Ummah dan Wanita YADIM, Ustaz Azhar Yahya serta Pengarah YADIM Melaka, Muzafar Abd Rahim.





KANAK KANAK PENGIDAP PENYAKIT SARAF TERIMA SUMBANGAN YADIM

JENGKA – Diserang sawan sejak berusia lima bulan mengakibatkan Ainul Mardhiah Mohd Azmi, 10 bulan tidak seperti kanak kanak lain. Keadaannya menyebabkan keluarganya perlu menumpukan lebih perhatian terhadapnya yang mengidap penyakit saraf.

Bagi tujuan meringankan sedikit beban keluarga ini, Yayasan Dakwah Islamiah Malaysia (YADIM) pada 22 April tampil menghulurkan sumbangan kepada mereka.

Sumbangan berupa barangan keperluan harian dan sedikit wang tunai disampaikan oleh Yang Dipertua YADIM, Ustaz Nasrudin Hassan di kediaman mereka di Jengka 22 di sini.

Hadir sama ialah Ahli Dewan Undangan Negeri Jengka, Yang Berhormat Ustaz Shahril Azman Abdul Halim dan Pengarah YADIM Pahang, Ustaz Hazmi Dibok.

Pada hari yang sama, Ustaz Nasrudin juga sempat meninjau ke kediaman Muhammad Husairi Nazri yang kini dalam pembinaan di Jengka 11.

Rumah berkenaan dibina secara gotong royong oleh anggota Jabatan AMAL Malaysia, dan sebahagiannya daripada program Is'ad Al Ussrah YADIM, dijangka akan siap sepenuhnya selepas Aidilfitri.

Keluarga berkenaan kini menumpang sementara di inap desa milik rakan mereka.

Semoga dipermudahkan semua urusan mereka.

MAJLIS IFTAR BERSAMA YDP YADIM DI DARUL IMAN TRAINING CENTRE

KEMAMAN – Lebih 40 warga Villa Mawaddah, sebuah rumah menempatkan kanak-kanak kurang bernasib baik di sini diraikan dalam Majlis Iftar Bersama Yang Dipertua Yayasan Dakwah Islamiah Malaysia (YADIM) di Darul Iman Training Centre (DITC) pada 30 April.

Yang Dipertua YADIM, Ustaz Nasrudin Hassan dalam ucapannya berkata, pihaknya akan sentiasa menghulurkan tangan membantu pihak-pihak seperti Villa Mawaddah sebagai tanggungjawab dan salah satu gerak kerja dakwahnya.

“Kami juga menyeru orang ramai yang berkemampuan, individu atau organisasi untuk tampil menghulurkan bantuan membantu misi ini,” ujarnya dalam ucapan pada majlis berbuka puasa itu.

Hadir sama ke majlis ini ialah Pengarah YADIM Terengganu, Ustaz Nasrul Hadi Saiadin, Pengerusi Darul DITC Ustaz Hazri Jusoh, Presiden Yayasan Amal Malaysia Tuan Haji Hussin Ismail serta Pengarah Villa Mawaddah, Dr Rosni Adam.

Sementara itu, pada majlis ini YADIM turut menyumbang RM6,000 untuk surau DITC yang disampaikan oleh Ustaz Nasrudin.



EDARAN BUBUR LAMBUK YADIM PERLIS

JEJAWI – Pada Ramadan tahun ini, Yayasan Dakwah Islamiah Malaysia (YADIM) Perlis turut tidak ketinggalan dalam mengadakan program mengimarahkan bulan penuh berkah ini.

Pada 30 April, bertempat Pusat Aktiviti Warga Emas (PAWE) Jabatan Kebajikan Masyarakat Perlis, telah diadakan Program Seikhlas Ramadhan yang turut melibatkan Rakan Siswa YADIM.

Antara pengisian program termasuklah memasak dan mengedar bubur lambuk di sekitar Kangar.

Seramai 50 peserta terlibat dalam program ini. Hadir sama ialah Pengarah Jabatan Kebajikan Masyarakat Perlis, Hazam Ismail dan Pengerusi PAWE, Saadiah Habil.

Pada sebelah petang pula diadakan gotong royong menyediakan bubur lambuk bersama Ibu Pejabat Polis Kontinjen Perlis dengan kehadiran Ahli Lembaga Pemegang Amanah YADIM, Dato Fathul Bari Mat Jahya, Sukarelawan YADIM, Yayasan IKAF serta kerjasama Masjid Al Mustaqim di Seriab.

IPK Perlis diwakili oleh Deputy Supritendan Surirani Ali dalam program ini.

Secara keseluruhannya, sebanyak 700 pek bubur lambuk diedarkan kepada orang ramai oleh YADIM Perlis pada 30 April.






MAJLIS BERBUKA PUASA DAN PENYAMPAIAN SUMBANGAN ANAK-ANAK YATIM

BUKIT MERTA JAM – Satu majlis berbuka puasa serta penyampaian sumbangan kepada anak-anak yatim dan mualaf telah diadakan pada 29 April bertempat di Restoran Route 69 di sini, anjuran Yayasan Dakwah Islamiah Malaysia (YADIM) Pulau Pinang.

Seramai 22 anak yatim dan 15 mualaf diraikan dalam majlis ini. Sumbangan berupa wang tunai dari YADIM diberikan kepada mereka yang hadir.

Majlis dimulakan dengan ceramah yang disampaikan oleh penceramah bebas, Ustaz Rosmanizam Rosdi dengan tajuk 'Ibrah Ramadan'.

Ahli Lembaga Pemegang Amanah YADIM, Mohd Zikri Zulkfli juga hadir ke majlis ini selain Pengarah YADIM Pulau Pinang Ustaz Afifi Ruslan, Sukarelawan YADIM Bukit Mertajam dan Sukarelawan YADIM Dewan Undangan Negeri Penanti.



ISÁD AL USRAH DAIE YADIM

GOMBAK – Bertempat di Kampung Orang Asli Bukit Kala Batu 12 di sini, Bahagian Khidmat Bakti Yayasan Dakwah Islamiah Malaysia (YADIM) telah mengadakan program Isád Al Usrah bagi tujuan pembaikan kediaman seorang penduduk di sini.

Program yang dijayakan dengan kerjasama badan bukan kerajaan (NGO) Syabab Care Malaysia dan Masjid Utara Gombak ini berhasrat menjalinkan hubungan antara pihak YADIM bersama NGO lain serta penduduk kampung setempat selain menyalurkan bantuan kepada mereka yang memerlukan.

Kediaman yang dibaiki ini adalah milik Daie Dai Orang Asli YADIM yang menjadi agen dakwah di kawasan ini, Sofea Norlin Anjang.

Pembaikan yang dilaksanakan ialah menggantikan atap rumah tersebut yang sudah berkarat dan bocor.

Kebocoran itu juga menyebabkan beberapa bahagian di rumah kayu ini reput akibat kerap terkena air hujan. Selain itu, turut disumbangkan set peralatan mandi,



makanan ringan, kelengkapan ibadah, tilam lipat, naskah Al Quran serta bahan bacaan dan mengajar.

Hadir ke program ini ialah Ahli Lembaga Pengarah YADIM, Dr Safinar Salleh, Pengarah Kanan Sektor Pembangunan Ummah dan Wanita YADIM, Ustaz Azhar Yahya dan Ustaz Fadzli Abu Bakar daripada NGO Syabab Care.

Isád Al Usrah adalah program membaiki kediaman asnaf terpilih oleh YADIM bagi menaik taraf dan memberi keselesaan serta keceriaan kepada mereka. Ia sebelum ini telah diadakan di beberapa lokasi seperti Klang, Batu Kurau, Kuala Linggi dan Gua Musang.



PROGRAM IFTAR & PENYAMPAIAN SUMBANGAN KEPADA ASNAF DAN GELANDANGAN

JOHOR BAHRU – Telah berlangsung program Iftar Dan Penyampaian Sumbangan kepada Asnaf & Gelandangan di Anjung Singgah Yayasan Kebajikan Negara Zon Selatan pada 25 April.

Program ini adalah anjuran bersama Yayasan Dakwah Islamiah Malaysia (YADIM) Johor, Yayasan Kebajikan Negara (YKN) Zon Selatan, Pertubuhan Johor Bahru Prihatin dan Perkim Johor Bahru.

Majlis dimulakan dengan ucapan Aluan oleh Pengarah YADIM Johor Muhammad Ammar Abdullah, Pengarah

YKN Zon Selatan Zahawairani dan Pengerusi Johor Bahru Prihatin Dr Mazri Yahya.

Majlis diteruskan dengan tazkirah berkenaan Ramadan, sebelum diadakan penyampaian sumbangan kepada asnaf oleh YADIM Johor dan Pertubuhan Johor Bahru Prihatin.

Seramai 30 orang menerima pek bantuan makanan asas dan jamuan untuk berbuka puasa. Setiausaha Kerja PERKIM Johor, Haji Saiful Choo Abdullah turut hadir ke program ini.





YADIM PEDULI DI PASAR MALAM **BANDAR DARUL AMAN** DAN **KODIANG**

JITRA – Nasib golongan yang memerlukan terus dibantu oleh Yayasan Dakwah Islamiah Malaysia (YADIM) Kedah di negeri ini.

Terbaharu pada 3 Mac, YADIM Kedah menyantuni seramai 20 orang peniaga pasar malam di Bandar Darul Aman di sini. Mereka menerima barangan keperluan harian untuk meringankan beban akibat terjejas secara langsung dengan Covid-19.



Selesai bersama peniaga pasar malam, program diteruskan dengan menyantuni, seorang pemuda Orang Kelainan Upaya berusia 18 tahun di sini. Beliau yang baharu saja kehilangan ayahnya masih belum memiliki kad pengenalan.

Melalui kerjasama dengan Jabatan Pendaftaran Negara yang datang ke kediamannya untuk mendapatkan kad pengenalan, YADIM juga menyampaikan sumbangan barangan keperluan harian dan lampin pakai buang.

Ini merupakan kali kedua YADIM bekerjasama dengan JPN Kedah dalam menyantuni mereka yang memerlukan. Pada 1 Mac lalu, kedua agensi ini membantu seorang warga emas di Kuala Kedah menerusi penggantian kad pengenalan dan sumbangan barangan keperluan harian.



Program ini diadakan dengan kerjasama Majlis Dakwah Negara (MDN) Kedah dan rakan badan bukan kerajaan Dhuafa Sejahtera dan Inisiatif Bandar Selamat.

Hadir ke majlis ini ialah Pengarah YADIM Kedah, Ustaz Mohd Aizat Zakaria, Pesuruhjaya MDN Kedah Prof. Madya Dr Nasri Md Hussin, Pengerusi Dhuafa Sejahtera, Amin Ismail, Pengerusi Inisiatif Bandar Selamat, Hamid serta Pengerusi Persatuan Pasar Malam Kubang, Pasu Shaimi Ahmad.



YADIM

- JAKEL SANTUNI VETERAN ATM KELANTAN SEMPENA RAMADAN

KOTA BHARU – Tiada siapa dapat menafikan sumbangan jasa dan pengorbanan anggota Angkatan Tentera Malaysia (ATM) yang menyabung nyawa menjaga keamanan negara.

Justeru bagi menghargai peranan mereka, Yayasan Dakwah Islamiah Malaysia (YADIM) Kelantan pada 7 April telah bekerjasama dengan syarikat tekstil terkemuka negara, Jakel Sdn Bhd bagi membantu meringankan beban dan memberi keceriaan kepada para veteran tentera di negara ini, khususnya untuk menyambut Ramadan yang bakal tiba tidak lama lagi.

Hadir dalam majlis ini Pengarah YADIM Kelantan, Ustaz Mahadi Awang, Pengarah Jabatan Hal Ehwal Veteran ATM Cawangan Negeri Kelantan dan Terengganu, Mejar Syed Mohamed Ifandi Syed Jaafar dan Ishak Ismail selaku wakil daripada syarikat Jakel Sdn. Bhd.

Selesai penyerahan di Kota Bharu, program penyerahan sumbangan diteruskan lagi dengan ziarah kepada lima orang veteran ATM di Ketereh, Kok Lanas, Kampung Joh, Machang dan Chenulang yang kesemua mengalami masalah kesihatan.



Untuk tujuan ini, Jakel telah bermurah hati menaja sumbangan untuk 100 veteran tentera yang memerlukan. Majlis sumbangan telah diadakan di bangunan Pusat Transformasi Bandar Kelantan di sini.



Webinar

Wanita Muslim Serantau 2021

PUTRAJAYA - Program Webinar Muslim Serantau yang diadakan pada 5 hingga 6 April 2021 anjuran Yayasan Dakwah Islamiah (YADIM) dan Universiti Teknologi Malaysia (UTM) melibatkan para cendekiawan daripada dalam dan luar negara untuk meneliti peranan wanita Muslim peringkat Asia Tenggara masa kini.

Program ini menekankan kepada beberapa objektif utama antaranya menyediakan platform maya bagi wacana perkongsian idea dan jaringan kolaborasi dalam kalangan tenaga pakar wanita serantau dari pelbagai peringkat dan institusi, memantapkan jaringan kepakaran pelbagai bidang dalam gagasan memperkasa wanita Islam dan sistem sokongan sedia ada bagi mendepani cabaran semasa serta membincangkan cabaran dan isu-isu semasa wanita Islam dalam memperkukuh gagasan pembangunan dan pemerkasaan wanita Islam.

Ia juga berhasrat mengasaskan perhubungan penyelidikan secara kolaborasi dalam bidang kajian wanita dan berkongsi hasil penyelidikan dan menerbitkan hasil penyelidikan berkaitan wanita melalui E-prosiding & Jurnal.

Antara tokoh serantau yang terlibat termasuklah Dr. Dinar Dewi Karnia dari Pusat Kajian Gender, Jakarta, Indonesia, Dr. Hajah Lilly Suzana Haji Shamsu, Dekan Fakulti Usuluddin Universiti Islam Sultan Sharif Ali, Brunei dan Dr. Zilal binti Saari dari Fakulti Sains Sosial dan Kemanusiaan, Universiti Teknologi Malaysia.

Malaysia turut menghantar Prof. Madya Dr. Fuadah Johari, Pensyarah Kanan, Fakulti Ekonomi dan Muamalat, Universiti Sains Islam Malaysia, Prof. Madya Dr. Sharifah Hayati Syed Ismail, Ketua Jabatan Siyasah Syariah, Akademi Pengajian Islam Universiti Malaya merangkap Ketua Sidang Editorial E-Jurnal YADIM dan ramai lagi tokoh akademik daripada pelbagai disiplin.

Perasmian program ini disempurnakan oleh Menteri di Jabatan Perdana Menteri (Hal Ehwal Agama), Yang Berhormat Senator Datuk Dr Zulkifli Mohamad Al Bakri selain turut melibatkan Yang Dipertua YADIM, Ustaz Nasrudin Hassan.



PENGAMBILAN CALON DAIE MUDA YADIM SIRI 3 (Sesi JULAI - OKTOBER 2021)

SYARAT-SYARAT

- ✓ KEUTAMAAN KEPADA GRADUAN IJAZAH PENGAJIAN ISLAM
- ✓ MAHIR DALAM BIDANG IT/MEDIA SOSIAL
- ✓ MINAT KEPADA LAPANGAN DAKWAH SEMASA
- ✓ BOLEH BERKOMUNIKASI DENGAN BAIK
- ✓ HIKMAH DALAM BERTINDAK
- ✓ CEPAT MENYESUAIKAN DIRI DENGAN KEADAAN
- ✓ MEMPUNYAI KETAHANAN MENTAL DAN FIZIKAL
- ✓ BERUMUR 21-30 TAHUN

*CALON DARI AGENSI KERAJAAN/SWASTA DAN NGO AMAT DIALU-ALUKAN

*CALON YANG TERPILIH AKAN MENGIKUTI KURSUS INTENSIF SELAMA 4 BULAN DI INSTITUT LATIHAN DAKWAH YADIM BERMULA JULAI-OKTOBER 2021


* ELAUN LATIHAN DISEDIAKAN SEPANJANG KURSUS.

CARA MEMOHON

Emelkan Profail Anda Ke DMY2021@yadim.com.my
Atau Hubungi Tel : 03-88703870
En. Khusnaini (018-2206759) En. Ali Imran (011-1246 6938)

YADIM
YAYASAN DAKWAH ISLAMIAH MALAYSIA

Kedai
**BUKU
YADIM**



40 Hadis Perjuangan

Panduan kepada
pejuang-pejuang Islam
berteraskan sunnah Nabi SAW

Harga
RM **25**



www.buku.yadim.com.my



Kedai Buku Yadim



@kedaibukuyadim

☎ 013 - 968 3504